

1877.

## NEW ZEALAND.

## PETITION OF REHA APERAHAMA AND 47 OTHERS.

*Presented 8th August, 1877, and ordered to be printed.*

Ki nga Mema Honore katoa o te Runanga Nui o te Paremata o te Koroni o Niu Tirenī e noho huihui ana. Tena ra koutou.

KO TA MATOU PITIHANA TENA KO TA NGA TANGATA E MAU AKE NEI O MATOU INGOA I RARO I ENEI KORERO, HE TANGATA MATOU NO NIU TIRENI I TE TAKIWA KI HAURAKI I TE POROWINI O AKARANA.

E WHAKAATU ANA;—

HE whenua to matou ko te Aroha kei Hauraki koia o koutou kai pitihana ka inoi nei ki a koutou ki nga rangatira o te Runanga Nui o Niu Tirenī kia ata whakaarohia e koutou a matou Take katoa kua tubia nei ki tenei pukapuka e inoi nei ki a koutou—ara mo to matou whenua mo te Aroha.

1. Ko taua whenua ko te Aroha i a matou anake i o matou tupuna me to matou hapu me Ngatitumutumu me matou hoki me tetahi taanga o te iwi o Ngatimaru i whakaurua nei ki nga uri o Ngatitumutumu. A ka whai take nui matou o matou hapu e noho tuturu nei i runga i tenei whenua i te Aroha o mua iho a tae noa mai ki a matou ki o ratou uri e noho nei i runga i tenei whenua i te Aroha inaianeī e mahi nei matou i nga mahi whai taketanga ki te whenua i runga i nga ritenga Maori.

2. Kihai rawa etahi hapu iwi ranei e noho ana i Hauraki i whai paanga i whai take ranei ki tenei whenua ki te Aroha i runga i nga ritenga Maori whai taketanga ki te whenua.

3. Kihai ano hoki tetahi iwi hapu ranei o nga iwi katoa e noho ana i Hauraki o etahi atu iwi ranei i mua iho, inaianeī ranei, i pana i whakahe ranei i te noho a o matou tupuna, a o matou hapu ranei i mua iho a tae noa mai ranei ki a matou e noho tuturu nei i runga i to matou whenua i te Aroha.

4. Engari i te wa i tu ai te Kooti Whenua Maori ka timata te whakawa pokanoa a tetahi iwi noa atu ehara nei i nga iwi o Hauraki hei tango tahae mana ma Ngatihaua o te iwi o Waikato i to matou whenua i te Aroha hei utu pea mo o ratou whenua i Waikato i murua nei e te Kawanatanga i runga i te rau o tana patu ki nga iwi o Waikato. Otira i hinga ratou i te Kooti whakamutunga mo tenei whenua.

5. E whakaatu ana o koutou kai pitihana ki to koutou Runanga Nui o nga Rangatira whakata-koto ture mo nga iwi e rua e noho nei i roto i te Koroni o Niu Tirenī, ara na James Mackay kai hoko whenua a te Kawanatanga nga hapu katoa o nga iwi o Hauraki i whakaeke ki runga i to matou whenua.

6. Ara, e whakaatu ana matou ko tana whakaeke i nga iwi o Hauraki ki runga i to matou whenua ara i hoatu e ia he moni ki ia tangata ki ia tangata ki ia hapu ki ia hapu o nga iwi katoa o Hauraki.

7. Kia ata marama ano hoki koutou e noho nei i roto i to koutou Runanga Rangatira, ara ko aua moni i hoatu e taua kai hoko whenua a te Kawanatanga ki aua iwi i te taone tonu o Hoterene, ehara hoki i te mea i hoatu aua moni e taua kai hoko whenua ki aua iwi i runga tonu i tenei whenua i te Aroha.

8. E kore ano hoki e taea e ia, e taua kai hoko whenua, te ata kawē atu nga tinana o aua iwi ki runga tonu i to matou whenua noho ai, ara e kore ano hoki aua iwi ake o ratou tinana ake ranei e tae a tinana atu ki te Aroha ata whakaatu ai ki taua kai hoko whenua i o ratou wahi i reira hei utu mo nga moni i a ratou. Ta te mea e tino mohio tuturu ana aua iwi kaore ratou o ratou tupuna ranei i pa ki tera whenua ki te Aroha.

9. Engari e whakaatu ana matou ara i koa rawa aua iwi mo te hoatutanga noatanga a taua kai hoko whenua i nga moni ma ratou mo taua whenua mo te Aroha, kaore nei o ratou paanga ki taua whenua, a e koa ana ano hoki ratou mo te hoatutanga noatanga a taua kai hoko whenua a te Kawanatanga i nga nama waipiro, paraoa, pihikete, huka, tii, me era atu mea a te pakeha ki a ratou a ko to matou whenua he utu.